

**„მაუწყებლობის შესახებ“ საქართველოს კანონში
ცვლილებებისა და დამატების შეტანის თაობაზე**

მუხლი 1. „მაუწყებლობის შესახებ“ საქართველოს კანონში (საქართველოს საკანონმდებლო მაცნე, N5, 18.01.2005, მუხ. 19) შეტანილ იქნეს შემდეგი ცვლილებები და დამატებები:

1. კანონის მე-2 მუხლს დაემატოს შემდეგი შინაარსის “3)” ქვეპუნქტი:

„3) აჭარის ავტონომიური რესპუბლიკის საზოგადოებრივი მაუწყებლობა – საქართველოს კანონმდებლობის შესაბამისად აჭარის ავტონომიური რესპუბლიკის ქონების საფუძველზე ტელერადიომაუწყებლობისათვის შექმნილი, საჯარო დაფინანსებით მოქმედი, ხელისუფლებისაგან დამოუკიდებელი და საზოგადოების წინაშე ანგარიშვალდებული საჯარო სამართლის იურიდიული პირის, რომელიც არ ექვემდებარება არც ერთ სახელმწიფო უწყებას (შემდგომში – აჭარის ავტონომიური რესპუბლიკის საზოგადოებრივი მაუწყებელი), მიერ განხორციელებული მაუწყებლობა, რომლის მიზანია პოლიტიკური და კომერციული გავლენისაგან თავისუფალი, საზოგადოებრივი ინტერესების, მათ შორის აჭარის ავტონომიური რესპუბლაში მცხოვრები საქართველოს მოქალაქეების ადგილობრივი ინტერესების შესაბამისი, მრავალფეროვანი პროგრამების მიწოდება საზოგადოებისათვის“.

2. მე-15 მუხლიდან ამოღებულ იქნას სიტყვა „ერთ“.

3. კანონს დაემატოს დაემატოს შემდეგი შინაარსის III¹ თავი:

„თავი III¹. აჭარის ავტონომიური რესპუბლიკის საზოგადოებრივი მაუწყებლობა

მუხლი 35¹. აჭარის ავტონომიური რესპუბლიკის საზოგადოებრივი მაუწყებლის სამართლებრივი სტატუსი

პოლიტიკური და კომერციული გავლენისაგან თავისუფალი და საზოგადოებრივი ინტერესების, მათ შორის აჭარის ავტონომიური რესპუბლაში მცხოვრები საქართველოს მოქალაქეების ადგილობრივი ინტერესების შესაბამისი პროგრამების საზოგადოებისათვის მიწოდების მიზნით ამ კანონის საფუძველზე იქმნება აჭარის ავტონომიური რესპუბლიკის საზოგადოებრივი მაუწყებელი, რომელიც არის საქართველოს კანონმდებლობის შესაბამისად აჭარის ავტონომიური რესპუბლიკის ქონების საფუძველზე ტელერადიომაუწყებლობისათვის შექმნილი, საჯარო დაფინანსებით მოქმედი, ხელისუფლებისაგან დამოუკიდებელი და საზოგადოების

წინაშე ანგარიშვალდებული საჯარო სამართლის იურიდიული პირი, რომელიც არ ექვემდებარება არც ერთ სახელმწიფო უწყებას.

მუხლი 35² შინაარსობრივი ვალდებულებები

აჭარის ავტონომიური რესპუბლიკის საზოგადოებრივი მაუწყებელი ვალდებულია დაიცვას ამ კანონის მე-16 მუხლით საქართველოს საზოგადოებრივი მაუწყებლისათვის დადგენილი შინაარსობრივი ვალდებულებები.

მუხლი 35³. აჭარის ავტონომიური რესპუბლიკის საზოგადოებრივი მაუწყებლის სიხშირეები

1. აჭარის ავტონომიური რესპუბლიკის საზოგადოებრივი მაუწყებელს განცხადების საფუძველზე კომისია ანიჭებს ამ კანონის ამოქმედების მომენტისათვის მის მიერ გამოყენებულ სიხშირეებს, რომელთა გამოყენების წესი და პირობები განისაზღვრება კომისიის გადაწყვეტილებით.

2. აჭარის ავტონომიური რესპუბლიკის საზოგადოებრივი მაუწყებლობა სიხშირეების გამოყენებით ხორციელდება 1 სატელევიზიო არხზე და 1 რადიოარხზე.

მუხლი 35⁴. დამოუკიდებლობა და ხელშეუხებლობა

1. აჭარის ავტონომიური რესპუბლიკის საზოგადოებრივი მაუწყებელი, მისი თანამდებობის პირი და თანამშრომელი საკუთარი უფლებამოსილებების განხორციელებისას დამოუკიდებელნი არიან და ემორჩილებიან მხოლოდ კანონს. მათ საქმიანობაზე უკანონო ზემოქმედება და ამ საქმიანობაში ჩარევა დაუშვებელია, ხოლო ამგვარი ზემოქმედებისა და ჩარევის შედეგად მიღებული გადაწყვეტილება – ბათილი.

2. იკრძალება აჭარის ავტონომიური რესპუბლიკის საზოგადოებრივი მაუწყებლის სარედაქციო, მმართველობითი და ფინანსური დამოუკიდებლობის ხელყოფა ან მასზე ზეწოლის სხვაგვარად განხორციელება ადმინისტრაციული ორგანოების მიერ.

3. დაინტერესებულ პირს უფლება აქვს მიმართოს სასამართლოს უკანონო ზემოქმედებისა და ჩარევის თავიდან აცილების ან აღკვეთის, აგრეთვე ამგვარი ზემოქმედებისა და ჩარევის შედეგად მიღებული გადაწყვეტილების ბათილად ცნობის მოთხოვნით.

4. აჭარის ავტონომიური რესპუბლიკის საზოგადოებრივი მაუწყებლის თანამდებობის პირის გადაწყვეტილება შეიძლება გასაჩივრდეს 30 დღის განმავლობაში აჭარის ავტონომიური რესპუბლიკის საზოგადოებრივი მაუწყებლის სამეურვეო საბჭოში ან სასამართლოში. სამეურვეო საბჭოს გადაწყვეტილება შეიძლება გასაჩივრდეს კომისიაში 30 დღის განმავლობაში ან სასამართლოში საქართველოს კანონმდებლობით დადგენილ ვადაში.

მუხლი 35⁵. ისტორიული ღირებულების პროგრამების არქივი

აჭარის ავტონომიური რესპუბლიკის საზოგადოებრივი მაუწყებელი ვალდებულია შექმნას არქივი და შეინახოს ისტორიული ღირებულების მქონე თავისი პროგრამები.

მუხლი 35⁶. პროგრამული პრიორიტეტები

1. სამეურვეო საბჭო განსაზღვრავს აჭარის ავტონომიური რესპუბლიკის საზოგადოებრივი მაუწყებლობის პროგრამულ პრიორიტეტებს საზოგადოებრივი აზრის კვლევის შედეგების, მაუწყებლობის სფეროში სახელმწიფო პოლიტიკის ძირითადი მიმართულებების, პრიორიტეტების და ადგილობრივი ინტერესების გათვალისწინებით.

2. აჭარის ავტონომიური რესპუბლიკის საზოგადოებრივი მაუწყებლის სამეურვეო საბჭო აჭარის ავტონომიური რესპუბლიკის საზოგადოებრივი მაუწყებლობის პროგრამული პრიორიტეტების შესახებ გადაწყვეტილებას იღებს საჯარო ადმინისტრაციული წარმოების წესით.

3. აჭარის ავტონომიური რესპუბლიკის საზოგადოებრივი მაუწყებლის პროგრამები დაცულია „საავტორო და მომიჯნავე უფლებების შესახებ“ საქართველოს კანონით და მათზე არ ვრცელდება საქართველოს ზოგადი ადმინისტრაციული კოდექსის III თავი.

მუხლი 35⁷. აჭარის ავტონომიური რესპუბლიკის საზოგადოებრივი მაუწყებლის მიერ ტელერადიოპროდუქციის ან/და მასთან დაკავშირებული მომსახურების, აგრეთვე სატელიტური თანამგზავრის საშუალებით ტელერადიოპროდუქციის გავრცელებასთან ან/და მის მიღებასთან დაკავშირებული მომსახურების შესყიდვა.

აჭარის ავტონომიური რესპუბლიკის საზოგადოებრივი მაუწყებლის მიერ განხორციელებული ტელერადიო პროდუქციის (პროგრამები, გადაცემები, ფილმები, რეპორტაჟები, კულტურული ღონისძიებები) ან/და მასთან დაკავშირებული მომსახურების შესყიდვა ხორციელდება „სახელმწიფო შესყიდვების შესახებ“ საქართველოს კანონის შესაბამისად, გარდა იმ შემთხვევებისა, როდესაც ხორციელდება არარეზიდენტი პირისაგან ტელერადიოპროდუქციის (პროგრამები, გადაცემები, ფილმები, რეპორტაჟები, კულტურული ღონისძიებები) ან/და მასთან დაკავშირებული მომსახურების, აგრეთვე სატელიტური თანამგზავრის საშუალებით ტელერადიოპროდუქციის (პროგრამები, გადაცემები, ფილმები, რეპორტაჟები, კულტურული ღონისძიებები) გავრცელებასთან ან/და მის მიღებასთან დაკავშირებული მომსახურების შესყიდვა.

მუხლი 35⁸. აჭარის ავტონომიური რესპუბლიკის საზოგადოებრივი მაუწყებლის საქმიანობის საჯაროობა

აჭარის ავტონომიური რესპუბლიკის საზოგადოებრივი მაუწყებელი უზრუნველყოფს საკუთარი საქმიანობის საჯაროობას, აწყოფს რეგულარულ შეხვედრებს

საზოგადოებასთან და ითვალისწინებს მოქალაქეთა წინადადებებს საზოგადოებრივი ინტერესების უკეთ გამოხატვის მიზნით.

მუხლი 35⁹. აჭარის ავტონომიური რესპუბლიკის საზოგადოებრივი მაუწყებლის სტრუქტურა

1. აჭარის ავტონომიური რესპუბლიკის საზოგადოებრივი მაუწყებლის ხელმძღვანელი ორგანოები არიან:

- ა) სამეურვეო საბჭო;
- ბ) დირექტორი.

2. აჭარის ავტონომიური რესპუბლიკის საზოგადოებრივი მაუწყებლის სტრუქტურა განისაზღვრება აჭარის ავტონომიური რესპუბლიკის საზოგადოებრივი მაუწყებლის დებულებით, რომელსაც დირექტორის წარდგინებით ამტკიცებს აჭარის ავტონომიური რესპუბლიკის საზოგადოებრივი მაუწყებლის სამეურვეო საბჭო.

მუხლი 35¹⁰. მეურვის, დირექტორისა და აჭარის ავტონომიური რესპუბლიკის საზოგადოებრივი მაუწყებლის თანამშრომლის ინტერესთა კონფლიქტი

1. მეურვეს ინტერესთა კონფლიქტი აქვს, თუ იმავედროულად:

- ა) არის სხვა ადმინისტრაციული ორგანოს თანამდებობის პირი;
- ბ) არის პოლიტიკური პარტიის წევრი;
- გ) ასრულებს რაიმე ანაზღაურებად სამუშაოს მაუწყებლობის სფეროში ლიცენზიის მფლობელისათვის;

დ) ფლობს იმ საწარმოს აქციებს ან საწესდებო კაპიტალის წილს, რომელიც ფლობს მაუწყებლობის სფეროში ლიცენზიას ან ახორციელებს ტელერადიოპროდუქციის წარმოებას ან/და მიწოდებას;

ე) არის თანამდებობის პირი, წარმომადგენელი, რწმუნებული ან კონსულტანტი იმ პირისა, რომელიც ფლობს მაუწყებლობის სფეროში ლიცენზიას ან ახორციელებს ტელერადიოპროდუქციის წარმოებას ან/და მიწოდებას;

ვ) აქვს სხვა პირდაპირი ან არაპირდაპირი ეკონომიკური ინტერესი იმ პირის მიმართ, რომელიც ფლობს მაუწყებლობის სფეროში ლიცენზიას ან ახორციელებს ტელერადიოპროდუქციის წარმოებას ან/და მიწოდებას.

2. მეურვე არ შეიძლება იყოს პირი, რომელსაც აქვს ამ მუხლის პირველი პუნქტით გათვალისწინებული ინტერესთა კონფლიქტი.

3. მეურვე არ შეიძლება იყოს პირი, რომლის ოჯახის წევრსაც აქვს ამ მუხლის პირველი პუნქტის „გ“-„ვ“ ქვეპუნქტებით გათვალისწინებული ინტერესთა კონფლიქტი.

4. დირექტორი არ შეიძლება იყოს პირი, რომელსაც აქვს ამ მუხლით გათვალისწინებული ინტერესთა კონფლიქტი.

5. დირექტორი არ შეიძლება იყოს პირი, რომლის ოჯახის წევრსაც აქვს ამ მუხლის პირველი პუნქტის „გ“-„ვ“ ქვეპუნქტებით გათვალისწინებული ინტერესთა კონფლიქტი.

6. აჭარის ავტონომიური რესპუბლიკის საზოგადოებრივი მაუწყებლის თანამშრომელს არა აქვს უფლება, ეკავოს თანამდებობა ან ასრულებდეს ანაზღაურებად სამუშაოს სხვა მაუწყებელთან.

7. მეურვე, დირექტორი ვალდებულია წერილობითი ფორმით განაცხადოს ბოლო 5 წლის განმავლობაში მისი ან მისი ოჯახის წევრის ამ მუხლის პირველი პუნქტით გათვალისწინებული ინტერესთა კონფლიქტის შესახებ.

მუხლი 35¹¹. სამეურვეო საბჭოს შემადგენლობა

1. სამეურვეო საბჭო შედგება მეურვეებისაგან, რომელთა რაოდენობას განსაზღვრავს აჭარის ავტონომიური რესპუბლიკის უმაღლესი საბჭო;

2. მეურვის უფლებამოსილების ვადაა 6 წელი.

3. სამეურვეო საბჭოს შემადგენლობის ერთი მესამედი იცვლება 2 წელიწადში ერთხელ, როტაციის წესით.

4. მეურვის უფლებამოსილების ვადამდე შეწყვეტის შემთხვევაში მის ნაცვლად დანიშნული ახალი მეურვის უფლებამოსილების ვადა განისაზღვრება წინა მეურვის უფლებამოსილების დარჩენილი ვადით. თუ მეურვის უფლებამოსილების ვადის გასვლამდე დარჩენილია 1 წელზე ნაკლები, მისი უფლებამოსილების ვადამდე შეწყვეტის შემთხვევაში მეურვის თანამდებობა რჩება ვაკანტური უფლებამოსილების ვადის ამოწურვამდე.

5. პირი არ შეიძლება დაინიშნოს მეურვედ ზედიზედ 2 ვადაზე მეტი ხნით.

6. მეურვეს სამეურვეო საქმიანობის განხორციელებისათვის ეძლევა ჰონორარი და აუნაზღაურდება ამ კანონით განსაზღვრული ფუნქციების შესრულების ხარჯები.

7. მეურვის ჰონორარისა და კანონით განსაზღვრული ფუნქციების შესასრულებლად საჭირო ხარჯების ოდენობებს განსაზღვრავს სამეურვეო საბჭო აჭარის ავტონომიური რესპუბლიკის საზოგადოებრივი მაუწყებლის ბიუჯეტის 1,5%-ის ფარგლებში, რომლიდანაც ჰონორარისთვის გამოყოფილი თანხა არ უნდა აღემატებოდეს 1%-ს.

მუხლი 35¹². მეურვის კანდიდატურის შერჩევა

1. მეურვის კანდიდატურა შეირჩევა ღია კონკურსით.

2. მეურვის უფლებამოსილების ვადის გასვლამდე 100 დღით ადრე ან მისი უფლებამოსილების შეწყვეტიდან 10 დღის განმავლობაში აჭარის ავტონომიური რესპუბლიკის მთავრობა გამოსცემს განკარგულებას კონკურსის ჩატარების შესახებ.

3. მეურვეობის კანდიდატი უნდა იყოს საზოგადოებრივი აღიარებისა და ნდობის მქონე პირი, უნდა ჰქონდეს უმაღლესი განათლება და არანაკლებ 5 წლის მუშაობის გამოცდილება.

4. ყველას აქვს მეურვის კანდიდატურის დასახელების უფლება კონკურსის გამოცხადებიდან 30 დღის განმავლობაში.

5. თუ კანონით განსაზღვრულ ვადაში არ დასახელდება 1 ვაკანტურ თანამდებობაზე არანაკლებ 3 კანდიდატურა, ცხადდება ახალი კონკურსი, რომელიც ტარდება ამ მუხლით დადგენილი წესით.

6. კანდიდატურების დასახელების ვადის ამოწურვიდან 10 დღის განმავლობაში კანდიდატთა სია ქვეყნდება პრესაში, მათ შორის ადგილობრივ პრესაში, გადაიცემა ტელევიზიით.

7. კანდიდატთა სიის გამოქვეყნებიდან 10 დღის ვადაში აჭარის ავტონომიური რესპუბლიკის მთავრობა ამ კანონით დადგენილი საკვალიფიკაციო მოთხოვნების გათვალისწინებით იღებს გადაწყვეტილებას კანდიდატურათა შერჩევის შესახებ და აჭარის ავტონომიური რესპუბლიკის უმაღლეს საბჭოს წარუდგენს 1 ვაკანტურ თანამდებობაზე არანაკლებ 3 კანდიდატურას.

მუხლი 35¹³. მეურვის დანიშვნა

1. აჭარის ავტონომიური რესპუბლიკის მთავრობის მიერ კანდიდატურების წარდგენიდან 30 დღის ვადაში, ხოლო უმაღლესი საბჭო არდადეგების შემთხვევაში – სესიის განახლებიდან 15 დღის ვადაში, აჭარის ავტონომიური რესპუბლიკის უმაღლესი საბჭო ფარული კენჭისყრით აძლევს თანხმობას აჭარის ავტონომიური რესპუბლიკის მთავრობას მეურვის დანიშვნაზე.

2. მეურვის ვაკანტურ თანამდებობაზე წარდგენილი კანდიდატის დანიშვნაზე თანხმობა მიცემულად ჩაითვლება, თუ იგი მიიღებს სხვა კანდიდატებზე მეტ ხმას, მაგრამ არანაკლებ აჭარის ავტონომიური რესპუბლიკის უმაღლესი საბჭოს სიითი შემადგენლობის ნახევრისა. ამ მაჩვენებლის თანაბრობის შემთხვევაში ტარდება ხელახალი კენჭისყრა.

3. თუ ვერც ერთი კანდიდატი ვერ მიიღებს აჭარის ავტონომიური რესპუბლიკის უმაღლესი საბჭოს სიითი შემადგენლობის ნახევარზე მეტის ხმებს, აჭარის ავტონომიური რესპუბლიკის მთავრობა 50 დღის ვადაში წარუდგენს უმაღლესი საბჭო ახალ კანდიდატურებს, რომელებიც შეირჩევიან ამ კანონის მე-35¹² მუხლით დადგენილი წესით. მეურვის ვაკანტურ თანამდებობაზე წარდგენილი კანდიდატის დანიშვნაზე თანხმობა მიცემულად ჩაითვლება, თუ კანდიდატი მიიღებს პლენარულ სხდომაზე დამსწრე უმაღლესი საბჭოს წევრთა ხმების უმრავლესობას, მაგრამ არანაკლებ უმაღლესი საბჭოს სრული შემადგენლობის ერთი მესამედისა.

4. აჭარის ავტონომიური რესპუბლიკის უმაღლესი საბჭოს მიერ თანხმობის მიცემის შემდეგ კანდიდატებს თანამდებობაზე ნიშნავს აჭარის ავტონომიური რესპუბლიკის მთავრობა.

მუხლი 35¹⁴. მეურვის თანამდებობიდან გათავისუფლება

1. აჭარის ავტონომიური რესპუბლიკის მთავრობა დაუყოვნებლივ ათავისუფლებს მეურვეს დაკავებული თანამდებობიდან და იწყებს ახალი კანდიდატურების შერჩევის პროცედურას, თუ მის მიმართ კანონიერ ძალაში შევა სასამართლოს გამამტყუნებელი განაჩენი, რომელიც სასჯელის სახით ითვალისწინებს თავისუფლების შეზღუდვას, ტუსაღობას ან თავისუფლების ვადიან ან უვადო აღკვეთას, ან თუ სასამართლო მას ქმედუუნაროდ ან უგზო-უკვლოდ დაკარგულად აღიარებს, აგრეთვე მისი გადადგომის ან გარდაცვალების შემთხვევაში.

2. უმაღლესი საბჭო სიითი შემადგენლობის არანაკლებ ერთ მესამედს შეუძლია აღძრას მეურვის თანამდებობიდან გათავისუფლების პროცედურა:

ა) ინტერესთა კონფლიქტის ამ კანონით დადგენილი ნორმების დარღვევის შემთხვევაში;

ბ) ზედიზედ 2 თვის განმავლობაში არასაკატიო მიზეზით მეურვის უფლებამოსილების შეუსრულებლობის შემთხვევაში.

3. პროცედურის ინიციატორმა უმაღლესი საბჭო წევრებმა დოკუმენტური მტკიცებულებებით უნდა დაასაბუთონ მეურვის თანამდებობიდან გათავისუფლების კონკრეტული საფუძველი.

4. ხელმოწერების შეგროვებიდან 30 დღის ვადაში უმაღლესი საბჭო სიითი შემადგენლობის უმრავლესობით პლენარული სხდომის დღის წესრიგში შეაქვს მეურვის თანამდებობიდან გათავისუფლების საკითხი.

5. დღის წესრიგში შეტანიდან 30 დღის განმავლობაში უმაღლესი საბჭო კენჭს უყრის მეურვის თანამდებობიდან გათავისუფლების საკითხს. მეურვის თანამდებობიდან გასათავისუფლებლად საჭიროა უმაღლესი საბჭო სიითი შემადგენლობის სამ მეხუთედზე მეტის თანხმობა.

6. თუ ხმების რაოდენობა საკმარისზე ნაკლებია ან უმაღლესი საბჭო არ ჩაატარებს კენჭისყრას ამ მუხლის მე-5 პუნქტით გათვალისწინებულ ვადაში, მეურვის თანამდებობიდან გათავისუფლების პროცედურა წყდება.

7. ერთი ფაქტის საფუძველზე მეურვის თანამდებობიდან გათავისუფლების საკითხის ორჯერ დაყენება დაუშვებელია.

8. მეურვის გათავისუფლების შესახებ გადაწყვეტილება შეიძლება გასაჩივრდეს სასამართლოში.

9. მეურვის თანამდებობიდან გათავისუფლების შესახებ უმაღლესი საბჭო გადაწყვეტილების სასამართლოში გასაჩივრებისას სასამართლოს შესაბამისი გადაწყვეტილების ძალაში შესვლის შემთხვევაში აჭარის ავტონომიური რესპუბლიკის მთავრობა გამოსცემს განკარგულებას მეურვის თანამდებობიდან გათავისუფლების თაობაზე.

მუხლი 35¹⁵. სამეურვეო საბჭოს სხდომა

1. სამეურვეო საბჭო გადაწყვეტილებას იღებს სხდომაზე. საბჭო უფლებამოსილია მიიღოს გადაწყვეტილება, თუ სხდომას ესწრება საბჭოს სიითი შემადგენლობის უმრავლესობა. საბჭო გადაწყვეტილებას იღებს დამსწრე წევრთა ხმების უმრავლესობით.

2. სამეურვეო საბჭოს სხდომა ტარდება არანაკლებ თვეში ერთხელ. რიგგარეშე სხდომას იწვევს საბჭოს თავმჯდომარე საკუთარი ინიციატივით ან წევრთა ერთი მესამედის, დირექტორის ან აჭარის ავტონომიური რესპუბლიკის საზოგადოებრივი მაუწყებლის აუდიტორის მოთხოვნით.

3. მომავალი სხდომისა და მისი დღის წესრიგის შესახებ მეურვეს უნდა ეცნობოს სხდომამდე 3 სამუშაო დღით ადრე.

4. გადაწყვეტილების მიღებისას თითოეულ მეურვეს აქვს 1 ხმა. ხმების თანაბრად გაყოფის შემთხვევაში გადაწყვეტია სამეურვეო საბჭოს თავმჯდომარის ხმა.

5. დირექტორს, აჭარის ავტონომიური რესპუბლიკის საზოგადოებრივი მაუწყებლის აუდიტორს და დამოუკიდებელ აუდიტორს უფლება აქვთ დაესწრონ სამეურვეო საბჭოს სხდომას. საბჭოს თავმჯდომარის თანხმობით ან/და დირექტორის ინიციატივით სხდომას შეიძლება დაესწროს აჭარის ავტონომიური რესპუბლიკის საზოგადოებრივი მაუწყებლის თანამდებობის პირი ან სხვა თანამშრომელი.

მუხლი 35¹⁶. სამეურვეო საბჭოს თავმჯდომარე და თავმჯდომარის მოადგილე

1. სამეურვეო საბჭოს თავმჯდომარეს და თავმჯდომარის მოადგილეს საკუთარი შემადგენლობიდან ირჩევენ მეურვეები პირველივე სხდომაზე, სამეურვეო საბჭოს სიითი შემადგენლობის უმრავლესობით.

2. სამეურვეო საბჭოს თავმჯდომარე, ხოლო მისი არყოფნის შემთხვევაში – თავმჯდომარის მოადგილე, იწვევს და წარმართავს საბჭოს სხდომებს, ხელს აწერს საბჭოს გადაწყვეტილებებს, წარმოადგენს საბჭოს დირექტორთან ურთიერთობაში.

3. სამეურვეო საბჭოს თავმჯდომარის უფლებამოსილების ვადის გასვლამდე არა უგვიანეს 30 დღისა მეურვეები საკუთარი შემადგენლობიდან ირჩევენ ახალ თავმჯდომარეს.

4. სამეურვეო საბჭოს თავმჯდომარე აირჩევა 3 წლის ვადით. პირი არ შეიძლება აირჩეს თავმჯდომარედ ზედიზედ 2 ვადაზე მეტი ხნით.

5. ახალარჩეული თავმჯდომარის უფლებამოსილება იწყება წინა თავმჯდომარის უფლებამოსილების შეწყვეტის მომენტიდან.

მუხლი 35¹⁷. სამეურვეო საბჭოს ფუნქციები

სამეურვეო საბჭო:

ა) განსაზღვრავს აჭარის ავტონომიური რესპუბლიკის საზოგადოებრივი მაუწყებლის პროგრამულ პრიორიტეტებს;

ბ) დირექტორის წარდგინებით ამტკიცებს აჭარის ავტონომიური რესპუბლიკის საზოგადოებრივი მაუწყებლის დებულებას;

გ) დირექტორის წარდგინებით ამტკიცებს აჭარის ავტონომიური რესპუბლიკის საზოგადოებრივი მაუწყებლის ბიუჯეტს და მისი შესრულების ანგარიშს;

დ) მოისმენს აჭარის ავტონომიური რესპუბლიკის საზოგადოებრივი მაუწყებლის საქმიანობის ყოველკვარტალურ ანგარიშს;

ე) თანხმობას აძლევს დირექტორს ისეთი გარიგების დადებაზე, რომლის ღირებულება აღემატება აჭარის ავტონომიური რესპუბლიკის საზოგადოებრივი მაუწყებლის ბიუჯეტის 1%-ს;

ვ) ამტკიცებს საზოგადოებრივი მაუწყებლის თანამშრომელთა სამტატო განრიგს და განსაზღვრავს დირექტორის შრომის ანაზღაურების პირობებსა და ოდენობას.

მუხლი 35¹⁸. საზოგადოებრივი საბჭოები

1. აჭარის ავტონომიური რესპუბლიკის საზოგადოებრივი მაუწყებლის ეთერში საზოგადოებრივი ინტერესებისა და მოთხოვნილებების წარმოდგენის, აგრეთვე ამ

კანონის მე-15² მუხლის გათვალისწინებით, მე-16 მუხლით განსაზღვრული შინაარსობრივი ვალდებულებების განხორციელების უზრუნველსაყოფად იქმნება საზოგადოებრივი საბჭოები, რომლებიც უფლებამოსილნი არიან საზოგადოების უშუალო მონაწილეობით შეიმუშაონ რეკომენდაციები აჭარის ავტონომიური რესპუბლიკის საზოგადოებრივი მაუწყებლისათვის.

2. საზოგადოებრივი საბჭოების რაოდენობა, ფორმირებისა და საქმიანობის წესი და ფუნქციები განისაზღვრება აჭარის ავტონომიური რესპუბლიკის საზოგადოებრივი მაუწყებლის დებულებით.

მუხლი 35¹⁹. დირექტორი

1. დირექტორს თანამდებობაზე ნიშნავს სამეურვეო საბჭო ღია კონკურსის წესით, 6 წლის ვადით. დირექტორის მეორე ვადით დანიშვნა შესაძლებელია ღია კონკურსის გარეშე.

2. დირექტორის თანამდებობაზე ღია კონკურსის ჩატარება და დირექტორის დანიშვნა უნდა განხორციელდეს ვაკანსიის წარმოშობიდან 1 თვის ვადაში.

3. სამეურვეო საბჭო დირექტორთან აფორმებს ხელშეკრულებას.

4. დირექტორი ამ კანონით დადგენილი წესით ხელმძღვანელობს და წარმართავს აჭარის ავტონომიური რესპუბლიკის საზოგადოებრივი მაუწყებლის საქმიანობას, წარმოადგენს მას მესამე პირებთან ურთიერთობაში.

მუხლი 35²⁰. დირექტორის თანამდებობიდან გათავისუფლების წესი და პირობები

1. დირექტორის თანამდებობიდან გათავისუფლების საფუძველია:

ა) ვადის ამოწურვა;

ბ) სამეურვეო საბჭოს გადაწყვეტილება დირექტორისათვის უნდობლობის გამოცხადების შესახებ;

გ) სასამართლოს კანონიერ ძალაში შესული გამამტყუნებელი განაჩენი;

დ) პირადი განცხადება;

ე) გარდაცვალება.

2. სამეურვეო საბჭო უფლებამოსილია იმსჯელოს დირექტორისათვის უნდობლობის გამოცხადებისა და ამ საფუძველით ვადამდე გათავისუფლების თაობაზე, თუ აღნიშნული საკითხის განხილვას წერილობით მოითხოვს საბჭოს წევრთა სრული შემადგენლობის ერთი მესამედი მაინც.

3. ამ მუხლის მე-2 პუნქტით გათვალისწინებული საფუძველით დირექტორის ვადამდე გათავისუფლების შესახებ სამეურვეო საბჭოს გადაწყვეტილება მიღებულად ჩაითვლება, თუ მას მხარს დაუჭერს საბჭოს წევრთა სრული შემადგენლობის ორი მესამედი.

4. თუ სამეურვეო საბჭოს წევრთა ინიციატივას დირექტორისათვის უნდობლობის გამოცხადების შესახებ მხარს არ დაუჭერს ამ მუხლის მე-3 პუნქტით განსაზღვრული საბჭოს წევრთა რაოდენობა, დირექტორის მიმართ უნდობლობის საკითხის განხილვა მომდევნო 6 თვის განმავლობაში დაუშვებელია.

მუხლი 35²¹. აჭარის ავტონომიური რესპუბლიკის საზოგადოებრივი მაუწყებლის ბიუჯეტი, მაუწყებლობის გადასახდელი

1. აჭარის ავტონომიური რესპუბლიკის საზოგადოებრივი მაუწყებლის ბიუჯეტს ამტკიცებს სამეურვეო საბჭო.

2. აჭარის ავტონომიური რესპუბლიკის საზოგადოებრივი მაუწყებლის ბიუჯეტს ქმნის აჭარის ავტონომიური რესპუბლიკის საზოგადოებრივი მაუწყებლობის გადასახდელი და საქართველოს კანონმდებლობით განსაზღვრული ან/და ნებადართული სხვა შემოსავლები.

3. აჭარის ავტონომიური რესპუბლიკის საზოგადოებრივი მაუწყებლობის გადასახდელის გადამხდელია ყველა ფიზიკური პირი, რომელსაც აჭარის ავტონომიურ რესპუბლიკაში აქვს საშემოსავლო გადასახადით დასაბეგრი შემოსავალი.

4. აჭარის ავტონომიური რესპუბლიკის საზოგადოებრივი მაუწყებლის გადასახდელი ყოველთვიურად ირიცხება აჭარის ავტონომიური რესპუბლიკის საზოგადოებრივი მაუწყებლის ანგარიშზე.

5. ამ მუხლის მე-2–მე-4 პუნქტების ამოქმედებამდე აჭარის ავტონომიური რესპუბლიკის საზოგადოებრივი მაუწყებლობის დაფინანსების ძირითადი წყარო არის აჭარის ავტონომიური რესპუბლიკის ბიუჯეტი.

6. აჭარის ავტონომიური რესპუბლიკის საზოგადოებრივი მაუწყებელი უფლებამოსილია კანონმდებლობით განსაზღვრული შემოსავლები, მათ შორის, აჭარის ავტონომიური რესპუბლიკის ბიუჯეტიდან მიღებული ასიგნებები, მიმართოს საკრედიტო დავალიანებების და წლის ბოლოს წარმოქმნილი გარდამავალი გადასახდელების დასაფარავად.

მუხლი 35²². აუდიტი

1. სამეურვეო საბჭოს მიერ კონკურსის წესით დანიშნული დამოუკიდებელი აუდიტორი არანაკლებ წელიწადში ერთხელ ატარებს აჭარის ავტონომიური რესპუბლიკის საზოგადოებრივი მაუწყებლის გარე აუდიტს.

2. დირექტორი სამეურვეო საბჭოსთან შეთანხმებით ნიშნავს აჭარის ავტონომიური რესპუბლიკის საზოგადოებრივი მაუწყებლის აუდიტორს, რომელიც რეგულარულად ატარებს აჭარის ავტონომიური რესპუბლიკის საზოგადოებრივი მაუწყებლის შიდა აუდიტს. აჭარის ავტონომიური რესპუბლიკის საზოგადოებრივი მაუწყებლის აუდიტორი ანგარიშვალდებულია დირექტორისა და სამეურვეო საბჭოს წინაშე.

3. სამეურვეო საბჭოს თავმჯდომარეს, გენერალურ დირექტორს, სამეურვეო საბჭოს სიითი შემადგენლობის ერთ მესამედს უფლება აქვთ დაავალონ აჭარის ავტონომიური რესპუბლიკის საზოგადოებრივი მაუწყებლის აუდიტორს დამატებითი აუდიტის ჩატარება.

მუხლი 35²³. სამეურვეო საბჭოს ანგარიში

1. სამეურვეო საბჭო არა უგვიანეს ყოველი წლის 1 მაისისა აჭარის ავტონომიური რესპუბლიკის უმაღლესი საბჭოს და კომისიას წარუდგენს და აქვეყნებს აჭარის

ავტონომიური რესპუბლიკის საზოგადოებრივი მაუწყებლის გასული წლის საქმიანობის ანგარიშს.

2. ანგარიში უნდა შეიცავდეს ანალოგიურ ინფორმაციას, რაც საქართველოს საზოგადოებრივი მაუწყებლისათვის ამ კანონის 35-ე მუხლის მე-2 პუნქტით არის დადგენილი.

3. აჭარის ავტონომიური რესპუბლიკის უმაღლესი საბჭო უზრუნველყოფს ანგარიშის საჯარო განხილვას. საჯარო განხილვის შედეგები შეძლებისდაგვარად აისახება აჭარის ავტონომიური რესპუბლიკის საზოგადოებრივი მაუწყებლობის პროგრამულ პრიორიტეტებში.

4. საქართველოს პარლამენტისა და აჭარის ავტონომიური რესპუბლიკის უმაღლესი საბჭოს წევრს უფლება აქვს გამოითხოვოს და მიიღოს ნებისმიერი ინფორმაცია აჭარის ავტონომიური რესპუბლიკის საზოგადოებრივი მაუწყებლის საქმიანობის შესახებ.

მუხლი 35²³. აჭარის ავტონომიური რესპუბლიკის საზოგადოებრივი მაუწყებლის საქმიანობასთან დაკავშირებული მოთხოვნები

აჭარის ავტონომიური რესპუბლიკის საზოგადოებრივი მაუწყებლის საქმიანობაზე ვრცელდება ამ კანონით საქართველოს საზოგადოებრივი მაუწყებლისათვის დადგენილი მოთხოვნები, მათ შორის ლეცენზირებასთან დაკავშირებული ნორმები.

4. კანონის 76-ე მუხლის მე-19 პუნქტი ამოღებულ იქნას.

მუხლი 2. აჭარის ავტონომიური რესპუბლიკის მთავრობამ უზრუნველყონ ახლადშექმნილი საჯარო სამართლის იურიდიული პირის - აჭარის აჭარის ავტონომიური რესპუბლიკის საზოგადოებრივი მაუწყებლისათვის აჭარის ავტონომიური რესპუბლიკის მთავრობის საქვეუწყებო დაწესებულების - აჭარის ავტონომიური რესპუბლიკის ტელევიზიისა და რადიომაუწყებლობის დეპარტამენტის ბალანსზე რიცხული უძრავ-მოძრავი ქონების გადაცემა კანონმდებლობით დადგენილი წესით.

მუხლი 3. ეს კანონი ამოქმედდეს გამოქვეყნებისთანავე.

საქართველოს პრეზიდენტი

მიხეილ სააკაშვილი

თბილისი,

2011 წლის -----